

四庫全書

集部

欽定四庫全書

石倉歷代詩選卷二百六十八

明 曹學佺 編

元詩三十八

黃潛

雜詩

晨起步南園旭日朗以清  
葵花衆草中矍矍敷丹榮  
流光非汝私獨爾心自傾  
覽物有深懷佇立方含情

又

璞玉與寶劍淪落初未偶君看被湔祓各在千年後將  
身比金石誰當獨長久悠悠百代下相知復何有

又

春風著萬物欣欣皆自私可憐兒女花榮悴更相持獨  
有澗底松偃蹇如不知何疑揚執戟草玄鬢若絲

效古三首

上山見明月下山月相隨月豈知愛我我行自見之故

山日已遠故人不可思殷勤謝明月願爾無時虧

又

落花隨風吹各自東西飛花飛既不息水流復何極同  
生不同歸能勿異顏色木生則有枝豹死則有皮悠悠  
岐路間多言亦奚為

又

飲酒莫盡醉盡醉無餘懽讀書莫吊古吊古多悲酸蕭  
艾菽中野白露摧芳蘭鳳饑不得死鳴梟食琅玕去去

復去去采芝青雲端

連雨雜詩二首

我思仇山人山川莽回互十書九不致木葉頻歲暮頗  
聞近移居併失夢中路得無挈妻兒倒載入上去

又

今日曷不樂孤倡無與酬兀坐把書卷展玩不自休借  
問誰所為其人己千秋山雨政可聽撥書置床頭

晚晴

洩雲散積雨林水含餘清披衣有奇懷偶從林叟行新  
晴遠峯麗夕陰孤花明曠日固所虞聊茲息營營

夜歸

空山四寥寥落日翳榛莽蜿蜒草中徑躡屩度寒雨楠  
杉窈深黑忽忽疑伏虎林窮澗水明稍聽歸人語

曉行湖上

曉行重湖上旭日青林半露霧寒未除鳬鷺靜初散黃  
緣際餘景閃倏多遺玩會心乍有得撫已還成嘆夙予

丹霞約久茲芳洲畔獨往願易違離居歲方換沙暄止  
芽動春遠川華亂存期乃寂寞取適豈爛漫小隱倘見  
招漁樵共昏旦

西峴峯

層雲抱春岑急瀨洩嵌竇修蹊入窈窕衆綠蔚以茂名  
亭標水樂柱折荒碑仆幽尋得緇廬亂石扶結構青精  
午堪飯碧澗寒可漱平生慕真賞及此成邂逅冥探指  
絕頂有路忽通透綠蘿度蒙密翠氣濕衣袖身泐寥

內下睨人寰陋清謳雜風竹大嘯落巖狖東峰在睂睞  
可望不可就同遊却何時瑤草春已秀

述懷

端居有多感求志無餘營夙違金門路緬愛丹丘名謬  
忝君子顧捧已廁羣英卑棲念遠引窘步迷先征俛默  
敦宿尚低徊阻平生伏枕倦中夜攬衣寄遐情上天廓  
澄穆列宿揚光晶俯視林木改仰悲鴻鴈鳴跂予秉微  
素十年守柴荆希世乖近務慕隱餘衷誠願言良時晚



庶保幽人貞

寄方子踐子發

窮居悵無遂徂歲聿載陰飛翹隕芳華候蟲厲哀音急  
颼扇叢薄泣露棲喬林撫景慨往古端操思繼今折蘭  
合幽佩解纓濯清潄石林宵葱蒨佳栢鬱蕭森遺世豈  
余敢匡時非我任覽已謝高軌卽事念所欽纏綿阻道  
里緬邈眇岡岑委懷竚芳訊貽好在規箴

寄俞子易

閒居寡歡豫枉駕忻所旋清言邁修夜朱火銷餘煙嘉  
會良不易鬱抱罄所宣揆余徇微業春冬屢徂遷著徽  
作往哲馳芳謝時賢睠茲企三益揮袂增慨然杪秋淒  
且厲郊圻曠肝眠振飈卷飛藿積霧迷遐川契濶歲復  
流瞻望情所牽存期尚勿奪輔仁庶不謬紫芝無新曲  
白駒有遺篇矢心遂招要贈言比芳荃

東園晚歸

洪忍嬰近務超遙愛佳辰興言望東菑良苗藹津津鄙

人昧時趨曠途夙所遵幸遠簪組累稍欣田圃隣元元  
登故畦悠悠睇城闌理穢出新竹撼枯落荆薪夕日逗  
遠川餘暉散衣巾疊疊觀物變依依念農人渠渠長者  
言惻惻非賤貧

贈葉審言別

昔人稱好士乃有黃金臺黃金亦何物顧用驕賢才葉  
君被短褐志力何雄哉北走叫閭闔紅雲拍崔嵬終然  
無苟售自保同嬰孩車服非吾榮黃金真浮埃十年今

何官茅屋歌蒼苔豈無琅玕樹鳳飛故低徊一朝脫身  
去歛觀雲路開葉君善自愛往矣無嫌猜迷邦古所誚  
豈弟貴不回願言吐奇胃落落排風雷尚念窮賤者衡  
門守蒿萊

休日集於城南

投耒從遠遊牽世乖明畧豈不畏簡書未能置丘壑崇  
岡近盤互春物紛照灼休沐集諸彥迂趾惠前諾稍空  
林中尊復詠霞上作迢迢歷墟壠靡靡瞰城郭修楊蔭

晴渚野櫻散朱萼撫時悼推斤畢竟顧棲託損益向子  
明才能賈生薄睠言觀歲寒無將媿場藿

曉望

城頭鴉鳴曙起坐理冠幘開窓寫遙望煙霧竟川澤喧  
喧市聲動漠漠井氣白如何山中人歲暮塵埃客

發金陵留別一二同志

盛名不易居直道我所遵雖枉嘉遯志未渝白圭言罷  
釣出滄海迴帆溯江濱城闌遠滅沒風水屢崩奔蕭條

故交地愴恨遊子魂始雷茂陽澤孤生限窮鱗沈翔自  
殊勢衰榮實同根戰勝物可遺目擊道已存乘桴詎無  
取絕絃難具論寄言同心子毋徒念加餐

龍灣夜泊

乘潮出遠浦日暮北風平高亭不可望遙遙笳鼓聲月  
明寒鴈下江空夕煙生非關川途念沈憂坐自盈

秋夜觀書作

閒居感時駛獨學難為功眷言思古人幽懷極忡忡秉

燭起中夜攬卷來清風恭惟千載心皎潔懸無窮祇俗  
自升降道妙非汗隆後來亦奚爲黑白紛相攻華芳乍  
可悅軌轍何由通吾將離言說庶以觀其同所憂明爲  
累不懼蓄不豐開軒視明河白月當天中怡然掩書坐  
夜氣方鴻蒙

登錢山望菰城慨然而賦

吳興水爲州諸山若浮萍況此一培塿瑣屑世未名所  
欣漁樵居乃與緇錫并種竹有萬竿結茅無十楹老僧

解人意蹊履能相迎芳草被行逕朱藤暗巖扃蕭條空  
堦暮日照莓苔青猶嫌所歷卑未極遊眺情聳身白雲  
上始見春申城想當高會時樓觀飛青冥竭海薦壘勺  
窮山羞鼎錮安知千載後寂寞無人行煌煌冠蓋區壤  
壤孤兔營歸來朱門客聽此松風聲

靈源

偶為山中遊遠過雲闕宿蒼燈閃初夜雨氣蒸深屋時  
聞清梵音窈眇松林曲



草堂

迢迢上方界，水木翳清景。  
山深不可留，日暮衣裳冷。  
淒淒其懷昔，遊百歲嗟俄頃。

鹿田

披榛度空荒，突兀崖寺古。  
幽花雜紅白，老屋亞雲雨。  
前瞻石徑微，咫尺不得取。

寶峰

下山後上山，躡屩行沮洳。  
宿雲冒長嶺，旭日暎高樹。  
山

僧亦何為獨向城闌去

山橋

行行指木末路逐飛雲上時登巨石憇共聽春泉響尋源竟莫窮卽事成幽賞

寶石

暮投招提境明發首歸路舉頭望山椒遙認經行處重  
重巖壑間蒼然正煙霧

赤城

鷄鳴秣吾馬晚飯山中行何以慰旅懷赤城有嘉名灘  
長石齒齒樹細風泠泠時見巖壁間粲若丹砂明溫泉  
發其陽撫訶勤百靈前峰指金閣真境標殊庭自道人  
跡稀青岬雲氣生信美無少留緬然起深情

擔子窪

自從始出關數日走崖谷迢迢度偏嶺險盡得平陸坡  
陀皆土山高下紛起伏連天暗豐草不復見林木行人  
煙際來牛羊雨中牧颯然衣裳單咫尺異寒燠佇立方

有懷相逢仍問俗畏途宜疾驅更傍灣河宿

遊寶陀寺

十年望滄海臨流不能度蒼茫歲華晚邂逅舟楫具拂  
衣乘天風挂席隨煙霧且從蛟門發暝招翁洲住前瞻  
積水深島與青無數梅岑特孤絕遙見日出處寄身人  
境外矯首禪關路粲粲金砂石離離白花樹高期愜幽  
抱歷覽增遐慕嗒然坐忘言目送寒潮去

雪竇紀遊四首

移舟泊泉口我行已信宿天寒洲渚生峰迴川途曲煙霞罩蘭若別墅在林麓

又

高人欣相迎山門帶流水風生珠樹間月窺鏡池裏觸景遂成迷應接殊未已

又

幽尋指山椒崖傾忽如瀉仰身視木末懸水在足下冥冥巖袖中宴坐奚為者

又

興移初出山繫纜長汀樹夜來雪已深溪風愈難度猶  
疑鐘磬音遙遙白雲處

同王章甫待制校文上京八月十五夜宿龍門  
驛

涼風墮黃榆萬馬皆南馳而我方北首度關及鳴雞驛  
路更幽阻僕夫慘不怡徐驅待明發決濟窮煙霏貂裘  
者誰子怪我逢披衣為言霜露多遑遑獨安之我非不

自愛簡書今有期憶昔州縣間折腰向小兒荏苒二十  
年白首初登基同袍如燕鴻去住恒相違悠然慨平生  
與世何參差暝投龍門驛高館臨迴溪青岸拱白月水  
木含餘輝秋色故瀟洒我行殊未遲相從況魁彥炯若  
珊瑚枝衰暮奚足云一觴聊共持

送鄭以道

鄭君不羈客漫士常優游故人滿天上獨佐嶺南州嶺  
南風土異去天將萬里驛騎如流星衆手挽不止到官

定多暇坐對梅花時溪石秀可硯泚筆成新詩詩成付  
迴鴈動是春冬隔用儒行召君努力崇明德

題社左司西巖詩卷後

吾聞古達士大隱非山林如何鵷鷺間白駒起遐心遙  
遙望故山紫塞繚以深峰巒勢交集積翠千萬尋園廬  
在其下門巷常悄悄軒窓帶流泉花木久成陰春秫足  
新釀亦有書與琴終然戀魏闕未忍投華簪平明奉朝  
退粉署鬱沈沈披襟坐高閣獨對西山岑爽氣幸可致



塵慮安能侵勿云湏吾土始用窮登臨異方苟同得視  
古猶視今聊為招隱篇狂和巖中吟

題趙涼公瑞瓜圖

慶門集嘉況異瑞呈瓜田生五而成十奇偶出自然觀  
物可知德發祥匪由天願言植靈苑永奉君王前合形  
表同休雅詠流綿綿

歲晏

歲晏木葉落遙見東城隅雉堞鬱宮堯列屋何蕭疎悠

悠西南望赫赫金張廬退朝集冠蓋鳴珂沸通衢合還  
多俊遊並轡飛華裾顧盼有光彩行者為踟躕俯慙筋  
力微無從效馳驅日斜坐官舍還拂案上書緬彼川路  
長感此年運徂遲迴不能去嘆息將焉如

送王鍊師歸四明

飄飄采真侶乃在四明山霞居朝帝所瓊館留人門忽  
聞雙鳬舄却向東南還望之若流星邈然不可攀海月  
照堦砌天風飛佩環我何苦羈旅冰雪生朱顏

集淵明句題李中甫員外稼亭

東方有一士客養千金軀東帶候鳴鷄出則陪交輿代  
耕本非望暫與園田疎園田日夢想投冠旋舊墟興言  
在茲春新疇復應畬田父有好懷過門更相呼披草共  
來往履歷周故居悠悠待秋稼時還讀我書雖未量歲  
功栖遲固多娛此事真復樂此語真不虛餞送傾皇朝  
歸子念前途前途當幾許直至東海隅古時功名士事  
事在中都遙遙沮溺心君情定何如

湖上即事

垂雲晝濛濛湖面惟一色薄暮風更生際夜雪初積凝  
陰勢方盛塵境喧暫息坐久聞拏音忽然破寥閨

題清華亭

名區滙修渚流望俯平陸飛雨天際來遠峰淨如沐生  
香餘晚華繁陰藹嘉木秀色坐可攬終然不盈掬觸景  
幽興多接物道機熟誰能與之遊食芳飲山淥

述懷

圖象無停運日馭轉西陸原野多歸人翩翩共馳逐念  
昔居閒曹未老先納祿蒙恩列外監放浪湖一曲薄田  
皆舊畝敝廬非新卜白首重見招英遊並華轂寒松雖  
復凋幽蘭豈再馥宣尼譏患失伯陽貴止足時暮復何  
言終期返初服

雨

兀坐九十日雨聲殊未收花時翻益睡茅屋不禁愁生  
事吾何望春寒晚故留江波青滿眼萬里付雙鷗

寄友人

憐君山水意局促守柴扉故里悲秋草涼風滿褐衣滄  
洲斜日晚白社幾人歸寂寞分遙念天寒木葉稀

秋懷二首

稍稍秋河落娟娟宿露微天清江不息野迴樹相依回  
首狂歌數經心昨夢非流螢無思極巧入絳帷飛

又

風雨仍搖落江山且滯留懶從生事拙閒惜壯心休弱

蔓縈欹石空槎卧湫流興懷到微物世故劇悠悠

憑軒

信有儒冠誤憑軒意欲迷山深風雨惡天濶羽毛低  
旭日開炎瘴連城送鼓輦荷戈吾媿爾未敢嘆塗泥

風雨

風雨忽如此閉門方晝眠故應為計拙可復要人憐  
燈火荒村路桑麻杜曲田悠悠今視昔把卷一茫然

山中懷友

卓縈恒山秀相逢幾抱琴五年風雨別四海弟兄心雪  
外梅花遠山中桂樹深定知嵇叔夜高興薄雲林

聞子踐卧疾

吾子仍多病何人共解顏水聲和藥臼春色閉松關積  
雨連三月懷人劇萬山同遊况零落浩蕩可追攀

廢繫

不解照珠翠早同文字盟何言中路棄無復向人明雨  
宿高齋夢秋吟廢館情相看幾今夕及此慨平生



斷碑

零落秋風卧何年廢廟碑圖經愁莫載耆舊說頻移野  
燒龜跌失荒苔鳥跡疑遙知千載後拂拭轉堪悲

卧鐘

龍簾久摧折沈埋柰爾何畊民誰睥睨野衲自摩挲雅  
奏多年歇銘文幾字訛斜陽荆棘裏長伴舊銅駝

八詠樓

懷古荒碑在登樓晚望賒秋陰垂野薄江勢抱城斜天

地悲遊子水霜感歲華紅塵吹短褐歸興及清笳

九日登石頭城

背郭囂塵遠高秋川岳清幽懷初曠蕩陳迹故縱橫遙  
望龍盤舊長憐蟻穴爭紺園隨處闢粉堞向來傾撥草  
窺簪井看碑驗故塋門開蒼耳路亭愛翠微名遠樹淮  
南出滄江鳥外明人煙川浩渺風物歲崢嶸吹帽仍佳  
節傳觴但老兵登高未成賦覽古獨含情政復哀王粲  
何堪厭襮衡敝廬滄海曲目斷白雲生

送陳養直歸四明

迢迢剡河水同渡不同歸  
執袂方成別驚帆已若飛  
野橋行處酒風雪去時衣  
瞻望嗟何及天長鴻鴈微

送馬伯忱教授

卓犖青雲彥飛騰及妙年  
書成天祿閣座有廣文氊  
九陌車塵外千軍筆陣前  
白頭慚倚席臨別思茫然

題石門淨勝寺

十頃蒼陂上山迴地勢偏  
屋樓黃面老碑掛赤烏年  
葉

葉風荷顫層層雪瀑懸青燈夜寥閒獨照一僧禪

陽山昱上人訪予吳門寓舍求為湘竹詩予辭  
以未見竹上人不遠六十里自山中舁其竹  
而來好事有如此者欣然為賦長句

道人來自陽山麓手携舊種千竿竹小裁方斛不盈尺  
中有瀟湘江一曲未信天工能爾奇不知地脉從誰縮  
晴窓脩脩散煙霧眼底森然立羣玉豈期我乃累此君  
蒙犯風埃走塵俗故山荒遠重愁絕新句未成慙迫促

黃岡之產大中椽政用材美剗其腹願言保此終天年  
歲暮山中伴幽獨

題李氏白石山房

名山秀出鄱江曲上有立石如立玉尚書履聲忽已遠  
隱者新居在盤谷花開鳥鳴春畫永白雲重重養喬木  
夫君亦復稱其家有書能藏且能讀露鈔雪纂久愈富  
何啻鄴侯三萬軸山靈翁霍謹呵護夜半虹光發深屋  
引泉天井助芳潤大勝吳儂飲山渌我欲從之不可到

細字長書俄滿幅毫分縷析極根柢大義森然見條目  
鄙人媿莫知所對叩請安得留更僕頗聞石洞閤遺音  
龍門餘韻頌君續臨風傾詠寄綢繆衰朽終期挹膏馥

題張清夫心遠堂

吾聞古來賢達士不擇山林與朝市百年塵甕兩醺鷄  
鵬鷃逍遙俱可爾夫君平生瀟洒意俯睨軒裳猶弊屣  
翩然一舸鱸魚鄉歸來不待秋風起忘言兀兀坐終日  
天地古今齊一指但見山高湖水深青螺蕩漾銀盃裏

柴桑之人去我久風味何妨略相似神交冥漠雲海長  
目送歸鴻眇千里

題醉歌圖

翰林主人天上來布帆不為鱸魚開江湖渺渺天一色  
朝光暮靄相徘徊昔賢心賞餘勝處祇有水竹無亭臺  
碑材久已沒荆棘屐齒不復留莓苔後來視今猶視昔  
今我不樂胡為哉太官馬重遠莫致隣翁綠蟻浮新醅  
欣然一飲便終夕鼻端氣息如雲雷是間別有一天地

不知何處為蓬萊迴觀方內海一粟醯鷄塵甕何喧呶  
黃冠秘監太狂態騎鯨供奉非仙才揮毫政要真學士  
鋒車流水行相催瑤池曲宴多雨露歸歟酌彼黃金壘

感舊

華屋山丘不可期峴峰依舊綠參差空懷下榻延徐孺  
無復來舟訪戴逵日暮更聞隣舍笛歲寒惟有角弓詩  
舊遊寂寞成今古冷石秋花處處悲

早起



漠漠晴簷散薄雲獨搔華髮立清晨春風入樹無行迹  
晚月窺簾欲近人旋覺新吟隨夢寐不知清霧濕衣巾  
何人正踏長安陌想見看花拂面塵

獨立

數盡飛花一愴然壯心迢遞夕雲邊十年人事空流水  
二月風光已杜鵑過眼青春寧復得汚人黃土絕堪憐  
故園尚有平生約可使蒼苔到石田

寄友人

繫舸一別雲水鄉暮川葭莢空蒼蒼漳濱卧病他年憶  
渭北題詩春日長蕪青作花已爛熳楊柳飛絮若顛狂  
聞道茯苓已堪劇遲子青鞋經澗岡

夏日漫書

枕上初殘栢子香烏聲簾外已斜陽碧山過雨晴逾好  
綠樹無風晚自涼芳歲背人成荏苒好詩和夢落蒼茫  
求羊何不來三徑門掩殘書滿石床

逢葉伯幾

水煙沙雨送歸航  
楓葉蘆花已十霜  
瑤曲天風春夢遠  
墨池秋草故遊荒  
碧峰又是新迴鴈  
白石依然舊化羊  
一笑相逢却成別  
暮雲千里思茫茫

答友人

芝掌峰前一盃酒  
別離歲晚遞相望  
野梅如雪遙入眼  
曉鴈連天寒叫霜  
閉門窮巷燈火冷  
回首蒼山雲樹長  
幾時抱被却同宿  
愧爾詩筒遠送將

過烏傷墓

丹青像設始何年  
翁仲遺墟自古傳  
時有北人來下馬  
不知秦樹幾啼鵑  
牧童解指看碑路  
野衲分畊祭墓田  
回首長安西日外  
茂陵松栢正蒼煙

金陵天津橋

五雲零落渺天涯  
陳迹蒼茫日自斜  
畫角已吹邊塞曲  
紅藍新長內園花  
可憐遺老埋黃壤  
曾倚春風望翠華  
好在北山猿與鶴  
依然同住舊煙霞

送人歸豫章

已覺棲遲懶曳裾可能為我強躊躇一帆秋色紅塵外  
千里江關白鴈初建業水清誰共飲潯陽潮斷定無書  
黃金未盡朱顏在莫種桃花學隱居

余山

春雲牢落鴈無聲沙岸參差石有稜雙屐漫窮芳草逕  
一龕長愧白頭僧晴濤閃閃翻孤日山木昏昏卷翠藤  
後夜清風滿遙念夢遊空指上方燈

遣興

青雲如夢慨平生白髮驚春忽數莖  
漸覺文遊隨日別強知顏色逐人行  
百年松檟誰能去五畝煙霞故可耕  
妄念掃除渾欲盡少游何得尚相輕

客樓雨中

江城飄泊動經年盡日高樓閱過船  
睡起小窓初聽雨岸傍垂柳已生煙  
坐拋歲月今如此每望雲山欲泫然  
尚喜游從得諸彥時將樂事寄新篇

次韻答蔣春卿

不謂紅塵拂面時軒然談笑一舒眉晴風石鼎浮花乳  
夜雨春盤冷碧絲握手遂成三宿戀論心那覺十年遲  
酒船漁網歸無計未必山前白鷺知

花信

已覺尋芳去較遲千林紅紫想紛披幾經夜雨能無恙  
試問春風竟不知斜日游蜂應有夢野亭立馬已多時  
殷勤却是江南客曾擘冰霜寄一枝

送貢教授致仕歸里

宦情鄉思兩依依，獨裹寒氊去若飛。  
歲晏忍為千里別，林間驚見一人歸。  
官河遠樹迎仙棹，夕日暄風颭彩衣。  
漫使臨歧生悵望，可容泉石借餘輝。

陳山晚泊

一柱孤撐杳靄間，人言此是客星山。  
流風百世今誰嗣，應詔諸生故未還。  
荒冢草深迂石路，高齋月滿闕松關。  
窮年漫迹滄江上，及此維舟獨厚顏。

上巖寺訪一公



晚色微茫尚帶星修蹊犖确斷人行獨支瘦竹身猶健  
高入重雲地忽平落月正當山缺處細泉頻作雨來聲  
上方燈火青林曲隱隱疎鐘一再鳴

題東柯谷圖

長松翠竹密交加洞府新開碧海涯石上仙人留足跡  
春深澗水出桃花流傳圖畫來千里生長兒孫只一家  
目斷飛鴻那可到舊遊空指赤城霞

題雪竇妙高臺

偶為清遊宿梵宮  
凌晨試上最高峰  
水翻雪色寒猶落  
雲掩丹光遠更重  
舊有一僧能跨虎  
近聞三洞盡藏龍  
下方車馬應難到  
煙際惟聽日暮鐘

次韻題劉氏石壁精舍

佳城杳杳隔千峰  
精舍寥寥一徑通  
夜靜寒泉猶映月  
秋深老樹不驚風  
舊題尚喜苔碑在  
高卧無令蕙帳空  
我已倦遊今白髮  
有山如此願長終

留別一公琳公

浪走紅塵髻已絲此身端合老巖扉興來復舉山陰棹  
別去仍留海上衣夜聽泉聲如雨落晴看天末有雲歸  
浮萍飛絮何時定空使詩人付式微

送趙繼清潮州推官

相國南還有故居理官高選出新除承恩特與金魚袋  
訪舊爭迎駟馬車春入園扉庭草暗天低驛路嶺梅疏  
鳳池不隔同年面歸及梅花鴈影初

送孔御史歸曲阜

清流共喜聚羣賢  
新渥時間下九天  
東觀綉書何日了  
中丞遺笏要人傳  
過家莫久依林廟  
封事先須徹御筵  
千載斯文寄來哲  
臨分握手重懸懸

送龍南歐陽縣尹

絲綸閣下半同袍  
獨上南船去莫招  
出宰不嫌官俸薄  
過家那覺驛程遙  
長溪白石晴雲轉  
深洞黃茅毒霧消  
想見行春有佳句  
坐令遐俗變風謠

送尉彥誠道州經歷

一別垂垂四十年朔風吹鬢兩蒼然寒壇久座歸何日  
上幕初登望若仙莫使催科書下考盛談名理繼前賢  
春生馬首逢迴鴈併寫相思入近篇

送陳季和

高齋燈火正蕭條忽遡天風上沅寥共喜彈冠如貢禹  
豈期投筆學班超時清桴鼓元無用歲晚弓旌倘見招  
雪後江南春水活重來休厭驛程遙

次韻蘇侍郎平村暮歸

中臺多暇獨儀曹  
退食歸來路不遙  
扶老未須蒼玉杖  
行春聊過赤闌橋  
揮毫風雨傾三峽  
聽履星辰接九霄  
媿我白頭方倚席  
敢將巴曲和仙韶

送王止善簡校

官無失政吏無私  
鈎校寧煩事細微  
遙想名曹多暇日  
不妨高詠發清暉  
潮生江上仙舟迴  
春到湖邊驛使稀  
送盡北來南去客  
石田茅屋幾時歸

題莫氏山莊圖

旋移小隱傍南峯  
遠有咸平處士風  
山態近人猶偃蹇  
湖光無雨亦空濛  
行春杖履時時到  
臨水軒窓面面通  
別作新亭供戲劇  
青帘摇曳杏花中

積觀賦絕句

芙蓉峰下南朝寺  
水秀山明雨絕奇  
更向水窮山盡處  
一菴高貯碧雲師

又

山中今是太平民  
尚與人間隔幾塵  
流水桃花三百曲

莫教重誤武陵人

又

坐愛春泉響翠微  
玉花吹濕薜蘿衣  
何人爲擘冰壺破  
共看青天白練飛

避暑圖

一丘一壑古遺民  
十里清風不屬人  
閒對青山揮白羽  
世間何物是紅塵

松江舟中偶書



移舟夜泊華亭縣却聽吳歌思渺然最憶殿山湖北寺  
白雲堆裏看青天

桃竹畫眉圖

說盡春愁貌不成翠深紅遠若為情江南有客頭空白  
腸斷東風百轉聲

次韻虞閣學上京道中

欲去仍為一日留玉堂中夜有詞頭歸鞍曉逐南飛鴈  
猶及西山半夜秋

水僊圖

脩脩翠羽映鳴璫誰遣乘風過我傍  
歲晏高堂空四壁  
一簾煙雨夢瀟湘

題高公畫竹木

木葉蕭蕭半欲空  
竹竿裊裊不成叢  
絕憐意匠經營處  
都在風煙慘澹中

山水圖

老樹無陰石有稜  
亂山高下白雲層  
夢中猶識江南路

惟恨舟人喚不磨

桃源圖

山雲慘慘將為雨  
雲氣垂垂欲傍花  
莫問前村何處覓  
垂蘿盤石即吾家

題平章康里公春日杏園西即事詩後

鏘金戛玉音聲古  
挾石奔泉氣勢雄  
目斷雲車天路永  
小樓春雨杏花風

石倉歷代詩選卷二百六十八

欽定四庫全書

集部  
石倉歷代詩選卷二百六十九

詳校官庶吉士<sub>臣</sub>龍建槐

侍讀<sub>臣</sub>孫球覆勘

總校官進士<sub>臣</sub>朱鈐

校對官主事<sub>臣</sub>張慎和

謄錄監生<sub>臣</sub>李世麟

欽定四庫全書

石倉歷代詩選卷二百六十九

明  
曹學佺 編

元詩三十九

戴良

山有杞

山有杞于吳之里君子至止可以宴喜水有魚于吳之  
墟君子止居可以宴胥于山于水有軒牕牕何斯違斯

莫或遑處于水于山有亭閑閑何斯違斯莫或遑安  
其可懷耄將至矣今也不樂歲月逝矣爰作斯圖式歌  
且謹願言公退惟以逍遙其樂也哉

巫山高

巫山望欲極神女出何遲朝暮自雲雨君王徒夢思魂  
乘林樹合心著峽猿悲婉孌陽臺夜不知今是非

鴻雁生塞北行

鴻雁何從來千里度江湘當春既北飛涉秋復南翔豈

不念鄉塞所至逐炎涼客子別家久遙遙征路長朝遊  
齊魯國暮行吳越鄉何思拔秦茅惟憂繫否桑壯心移  
歲華徂貌委年霜蓬飛繞本根蕓落戀舊房此邦雖樂  
土故鄉焉可忘

艾如張

翠為衿錦為衣朝朝暮暮澤水飛澤中青草深且茂莫  
聽爾媒登壘雖壘頭西接桃李場蓬藿艾盡有羅張羅  
雖可避機莫測爾誤觸之恐身傷請看舊日張羅處祥

鳳冥鴻不肯顧

朱鷺

朱鷺何從止去啄金堤飲玉水朝隨赤雁暮碧鷄蕩漾  
驚波不得棲有時挾子上林去網絲紛紛復難避不如  
斂翅江海湄遠却幽并游俠兒

白頭吟

莫把白頭吟來調綠綺琴蜀客當年聘私室兩情總向  
琴中得誰信黃金買賦時已是青蛾辭寵日兔絲春來



託女蘿雪霜未至尚纏柯若箇人心如草木不到白頭  
妾遭逐妾有嫁時綠玉簪時時插髻悅君心一朝墜地  
雙股折恰似君心中道絕我簪縱折猶共藏君心一絕  
去他鄉

感懷

杪歲屬搖落青蒲忽青青萌達未幾日大火已南明天  
運一如是廢興安得停商郊遷夏鼎殷士裸周京冀方  
既已沒毫社亦云平務光真達道敝屣薄時榮

又

時秋救邊急喧呼聞點兵荒城接沙漠羣馬盡嘶鳴荷  
戟者誰子羸糧將遠征借問何所之天驕窺漢城西奔  
丁零塞北走單于亭窮冬冰雪交殊方不可行骨肉兩  
決絕悲極哭無聲怯卒當勁虜投魚軀長鯨已分沙場  
死暴骨無完形驅車舍之去不忍聽此聲聖人御宇內  
早使太階平

又

玄圃有丹木八榦何亭亭光同白玉潤液比碧瑤清不  
知何年代產此至陽精仙經所嘗言服之可千齡吾將  
具丹檝涉海掇其英

又

良辰豈長遇陰晦在須臾今日弗為樂明旦恐不如都  
門多佳麗清嘯當座隅促席道平素況有高士俱列俎  
過三鼎傾酒盡百壺揮金娛心意慷慨不留儲達人每  
滔蕩俗士恒自拘白頭懷轆軻撫已一長吁

又

落葉響空山  
羈鳥號窮林  
此時單居婦  
哀怨起瑤琴  
清商逐風轉  
三嘆有餘音  
分明曲中意  
感此離恨深  
空床亦易守  
時寒難獨禁  
涼飈一夕起  
達曙懷重衾  
君固執高節  
詎知傷妾心

又

家藏兩寶劍  
已合雌與雄  
潛鋒在金匣  
謂當長相從  
何言風雨夕  
化作雙蛟龍  
一遊吳水西  
一落豐城東  
相去

邈千里時時氣上衝神物終不隔歲晏會當逢

又

游魚返于淵飛鳥歸于山行子別鄉國既久何當還日  
落長風起稜稜氣遂寒居人息深帷浮客未遑餐憂虞  
銷素質風霜凋夙顏惟餘一寸心歲暮保貞堅

遊大慈山

水行境謂盡陸出路旋通乃即蒼松逕步入青蓮宮連  
嶂既嶄峩密林亦蔥蘢地涉清淨界身游紫翠重臨流

玩廣沼企石眺奇峰寒鏡湛秋夕碧玉劃晴空入寺瞻  
象教尋僧叩禪宗契理已無像觀念豈有窮願絕區中  
緣永依塵外蹤嗒然遺身世年齊天地終

遊天童山

避囂去城市遣悶在川岑遂申獨徃意行此無盡林松  
篁儼映鬱蒼翠邈深沈九隴山已見三生石可尋列障  
圍招提傑閣俯嶇嶇池光亂塔影澗流傳聲音龍化井  
已竭虎去泉徒深周顧信靈迹遲留多賞心念未委塵

妄事可息煩襟即理苟已協何用戀華簪

贈別汪定海

前舟已云發後舟更誰待春事動江皋客愁滿山海別  
晷只須臾會期知何在亦既違素心安得顏不改

又

故人忽已別兀兀吾何適暮投甬東路不見往來迹古  
寺靜脩廊空齋冷虛壁獨有階上苔猶如舊時碧

題盤隱軒

曲蹊繚深碧迴澗澄遙清誰知慈水上亦有盤谷名慕  
巢屏世喧等李薄時榮仿佛中原路迢遰太行行軒居  
儼映蔚薨棟欵崢嶸暑檻停綠樹夕堦飄素英一翁臨  
暮齒二肩當弱齡林醕報初熟瓢箪自同傾厭厭簡素  
展寂寂塵事冥窺鳥感歸翼觀魚悟潛形既已愜時物  
亦復諧友生琴書許交錯辭翰俾縱橫老我記曾遊遙  
途阻重征溪山寄幽夢林堂畱恨情可隨東浦月流光  
到君庭



遊定水

常公開化地源師講經處人物有古今山川無新故  
素馳既西峙鳴鶴亦東翥清泉冽廣沼蒼松夾來路入寺  
結青蓮叅方薰玉樹三足想後因四禪感前悟此生眞  
幻化學道奈遲暮感歎顧昔心悵然起遐慕

題蘭芳齋

靄靄高齋暮浮游此空林不遣蘭為友孰可與同心  
綠艷婉秋色紫葩搖夕陰芳意徒自負幽期竟安尋以之

念身世三嘆援孤琴猗猗不成操豈謂無知音

書畫舫宴集分得澹字

平生學已誤末齡道逾貶久酣世味醲益羨朋交淡座  
既接簪纓享復與昌歎偶會情即親未識氣已感驚鱗  
樂連藻倦翻媚叢莢既忝末席歡不飲吾何敢

龜毛廬

倦遊去朝市委懷在田園既悟執戟疲益知荷蓀賢夙  
晨飯牛出夕曛負耒還春作固云力秋斂未盈屢求羸

豈其願拙業乃所安不見龜上毛成氈亦良難

對春雪一首寄梧竹翁

常時寒已收今茲陰尚結惜此艷陽天盡付蕭騷雪穿  
花適自亂雜雨詎成潔獨有灞橋人詩思益清絕

畱別白沙諸友

頻年接歌笑誰忍隔音形一為寒竄迫頓忘離別情春  
帆已駕浦晨鼓亦催程可得重相過同聽夜潮聲

又

雨暗長江日鐘動寒城曙居人息深閣遊子行多露冥  
冥見煙花曖曖想雲樹不道絕遊從晨昏自難度

和陶淵明雜詩

大鈞播萬類飄忽如風塵為物在世中倏焉成我身弟  
兄與妻子於前定何親生同屋室處死與丘山隣彼蒼  
無私力宵盡已復晨獨有路旁堠長閱往來人

又

羲馭不肯遲榮瘁詎可量舉頭望穹昊日月已宿房隕

霜凋衆類慘慘未渠央李梅忽冬實又復值愆陽物化  
苟如此祇亂我中腸

又

朝耕谷口田暮採陌上桑歲晚望有收嗟哉成粃糠白  
頭去逐食所謀惟稻粱嗷嗷天海際何異鴈隨陽昨宵  
得竒夢可喜復可傷為言東海上却粒有其方早晚西  
王母酌以瑤池觴

又

天地有常運陰陽無定端夏蟲時不永安觀歲月遷嗟  
我在世中倏忽已華顛何能得仙訣拾取朝霞食蓬萊  
去此近欲往無由緣從今棄諸事盡付悟真篇

又

秦灰未遽冷於古何所稽前行有衢路往往變巖崖我  
來一問津感嘆傷人懷是道在天地大可六合彌諸儒  
拾煨燼破裂日愈離遂令高世才放蕩莫控羈時無洛  
中叟此事諒終虧

和淵明擬古

我昔年少時高視隘八荒  
惟思涉險道誰能戒垂堂  
南轅與北軌所歷何杳茫  
一旦十年後盡化爭戰場  
豈無英雄士幾人歸北邙  
撫此重長嘆壯志失軒昂  
斂退就衡宇蹙蹙守一方  
往事且棄置身在亦奚傷

又

勸君勿沈憂沈憂損天和  
尊中有美酒胡不飲且歌我  
觀此身世變幻一何多  
無相亦無壞信若空中花  
戚戚

以終老君今其奈何

又

牆頭有叢菊粲粲誰復採蹉跎歲年晚香色日以改我  
欲一往問渺渺阻煙海遙知霜霰繁黃葉不余待亦既  
輕去國已矣今何悔

和淵明飲酒

幽蘭在浚谷衆卉沒其英清風一吹拂卓然見高情萬  
物皆有時泰至否自傾蟄雷聲久悶未必先春鳴有酒



且歡酌何用嘆此生

又

三春布陽德萬物發華滋  
凌霄直微類近亦附喬枝  
低迷衆無覩高出乃見竒  
煌煌九霄中榮夸遽爾為  
我道似不爾一笑懸吾羈

又

我如北塞駒因此東南道  
有力不獲騁長鳴至于老  
苒苒陰陽移萬物遞榮槁  
既無騰化術此身豈長好  
一朝

委運往恐遂失吾寶何當攜麴生縱浪遊八表

又

靡靡歲云晏此已非吾時深居執蕩志逝將與世辭破  
屋交悲風得處正在茲握粟者誰子無煩決所疑道喪  
士失已節義久吾欺於心苟不愧窮達一仕之

又

老我愛窮居蓬蒿繞荒宅與世罕所同車馬絕來迹寓  
形天壤內幾人年滿百顧獨守區區保此堅與白若復

不醉飲此生端足惜

和淵明移居

昔我客華嶼古寺分半宅窮年無俗調看山閱朝夕如  
何舍之去遙遙從茲役朋遊方餞送賦詩仍設席共言  
新居好今更勝疇昔高歌縱逸舟持用慰離析

和淵明連雨獨飲

陶翁固貧士異患猶不干公田足種秫亦且居一官我  
無半畝宅三旬纔九餐況多身外憂有甚饑與寒委懷

窮櫺下何以開此顏清風颯然至高歌吾掩關

題巽上人游息軒

名山鬱嵒飛軒起弘敞覺花墮檻明忍草緣堦長日  
落萬壑冷風振百泉響掃庭驅虎出倚櫺延月上雲影  
共棲息山光同偃仰晚磬度筠清夕窓含澗爽偶造幽  
人境獲陪芳景賞談玄悟道言觀妙滅塵想良遊雖暫  
適多累詎長往所以俗中人昏昏在天壤

周伯溫侍御席上賦

浙浙扇晨飈塗塗散暝霏翳翳繁陰結淒淒陽卉腓開  
冬感徂物高會洽音徽嘉肴薦文理芳醕獻蘭卮列坐  
侍星弁駢筵遙緋帷綺席全當牖朱簾半隱扉已酣亭  
上酌復玩軒中奇美話既愉心麗句更流思清事古難  
偶歡合情所希及今不為樂後茲將待誰但乏瓊玖報  
虛蒙桃李施惟祝養生年黃髮以為期

遊湖上諸山

澄湖總地德連山雄寓縣嵐氣川上浮林影波中見東

臨帶吳會北拒衿楚甸上峙岫如複下亘水成練參差  
窺粉堞出沒露丹殿宏麗邁前聞遊觀踰昔踐君侯挺  
奇興軒蓋此追行雲隨朱旆揚路繞潁霞轉五藥芳可  
采三芝秀堪搴升高望已騁即卑趣仍展願言謝羈纏  
久茲事攀援結網政未能臨淵亦徒羨

同楊文舉提學游虎丘

疲榮厭府寺思間愛林丘今晨偶從告薄言為茲遊興  
馬出城郭冠蓋集朋儔尋雲共陟峴吟風同倚樓池浸

劍光冷石拱講堂幽丘虎餘昔勢慙泉溢前流舊聽已  
咸踐新賞復旁搜樹杪吳岫出天末楚雲浮睇迥距遙  
甸臨卑撫平疇萬象固如昨六龍寧暫留且茲酌芳醴  
相從滌繁憂豈不念行役天道良悠悠

對雨金達可送酒至

星躔離夜月桂渚發朝雷族雲起泉室零雨下陽臺飄  
簷方似霧集地復如埃空濛迷野鷺沾洒雜階苔旅人  
乏愉悅孤館獨徘徊久缺清酤至忽值白衣來豈不欲

為酌因君停玉杯

徐叔度遺紈扇

團團七華扇名在制久缺感君裂紈素與蒙却煩暍入  
手訝如珪映容疑學月玩之炎氣消握之微風發却願  
暑長在無使君暫歇

次韻宿西山

旦棹東湖溼暝策西山麓林光漏月清水影漾天綠初  
風草故和窮律轉新肅悲來攢人懷山房不成宿



題陳敬初小丹丘

遙遙念鄉縣晚志重仙靈  
結構避公館卧游資赤城  
瀾漫泉湧渠合沓雲翼樛峭嶸  
天末起飛流戶外清山川  
隔舊賞庭院暢新情靜有幽事  
悅動無塵慮縈何必踐  
台嶽茲道可長生

治圃詩

三春豐雨澤晨興觀我畦  
嘉蔬有餘滋草盛相與薺  
戮力治荒穢指景光已西  
好月因時來歸路杳然迷  
暮鳥

尋舊林晚獸遵故蹊我亦息微勞去去安吾棲

又

長夏罕人事齋居有餘閒北窓多悴物且遂灌吾園攢  
根既舒達積葉亦蔥芊欣欣繞畦長新葵應節鮮抱甕  
一回視生意盈化先在我豈不勞即境多所歡悠悠千  
載間樊生信為賢

又

苒苒素秋節淒淒天宇清翠杖視西園俛仰傷我情藪

藿日就凋惟見野草青草青亦幾日霜露早已零萬物  
會有終人生無久榮功勛苟不建未若託林壑所以荷  
簣翁長歌悲磬聲吾其理吾園聊以隱自名

又

窮冬霜露下谷風轉淒其以今四運周感茲百卉腓披  
榛歸北園墟里故依依桑竹餘朽株臺榭有遺基野老  
相與至嘲諧談昔時談罷輒引觴陶然無所思紛紜世  
中事寒暑相盛衰此理苟不勝役役徒爾為既以適吾

願何能忽去茲

上天池

良游思已愜勝地喜仍踐筍輿穿竹行雲路盤空轉蓮  
峰見翠崒天池覩清淺石竒斜匝林徑古曲藏蘚躊蹰  
日已晏沾洒露猶泣回駕諒難淹逸趣嘆莫展理亂良  
未形得喪竟誰辨寄言同懷客且茲息疲蹇

夜泊吳江長橋宿垂虹亭

閃閃練月宵稜稜素秋節舍棹上孤亭臨江候歸客佳

人殊未來幽意為誰適徘徊當夜半彷彿去天尺仰接  
銀河橫俯照星緯逼直疑穹壤連豈有人世隔飄飄形  
若蛻眇眇思何極居然怯風露聊復就衾席亦既不成  
寐將何慰茲夕賴有同心人連床話疇昔

遊吳山承天觀

石逕趨巍宮雲甍倚層壁昔聞帝子遊今見羽人宅鱗  
居庭際擁蜃閣窻外闢複嶺曲且盤喬林隱復直路縈  
賞心侶谷館咀芝客即近已欣覲撫遠亦驚覲離離越

樹青渺渺海門白乘風遲來潮倚月候歸汐徘徊憶天  
險俯仰峙地德于時將指使暫此盪塵臆豈無犬馬情  
終負煙霞癖何當解朝組相從隱仙籍

入湖源

榜舟渡長浦搔首望遙山西界出吳道東臨入越關到  
家諒匪遠跋馬勢不前懷祿吾豈敢行路古所難獨有  
山上雲既出復知還

欠場口

久宦迷故都故都在何處驅車向隣壤頭白不知路長  
林日夕行曠野東西顧方遠嘆途阻逾近覆心懼豈無  
入林翮莫與歸颺遇

望九靈山

九靈眇何許連峰高不極依稀接遠霧仿佛起寒色我  
家是山下別來歲頻易屋廬閒鳥聲冢墓遺獸跡可望  
不可至空多故鄉憶

贈婦

單居易為久此別難處心而況我佳儷有若比翼禽暮  
棲必並枝朝啄常共林中道一分散曠世絕形音跂彼  
雙睢鳩翻飛河之潯徘徊逐儔侶每與同浮沈今我反  
不如迢迢江與岑可能施兩翮乘風起相尋

傷李氏妾

皎皎彼姝子粲粲美容華鮮肌映朝日惠質鬪晴葩借  
問何從來生自公侯家一為箕帚役斂已絕矜誇居處  
辭曩貴食飲避前奢奈何九秋霜竟殞三春花時時想



爾形撫膺嘆以嗟

又

涼風撼房閨朗月照簾櫳佳人已冥冥髣髴覩爾容入  
室撫遺跡茵在惜床空海濶無回波葉落豈畱蓬茫茫  
百年內私懷誰克從

泛海

仲夏發會稽乍秋別勾章擬杭黑水海首渡青龍洋南  
條山已斷北界水何長遠近浪為國周圍天作疆川后

偶安恬天吳亦屏藏蕩漿乘月疾掛席逐風揚零露拂  
蟠木旭日耀扶桑我行無休隙此去何渺茫東海蹈仲  
連西溟適伯陽輕名冀道勝重已企時康孰謂情可陳  
旅念坐自傷

望大牢山

稍入東膠界即見大牢山峰攢倅劍戟嶂疊類雲煙稜  
稜插巨海渺渺漾中川波濤共突兀天日相澄鮮氓居  
接島嶼觀宇連術阡既館茹芝士亦巢遁世賢客行積

昏旦水宿倦舟船茲山思獨往結茅徵願言  
柁師不我從太息歸中原

抵膠州

舟行無休期晨夜涉風水蹈越歷吳鄉乘楚造齊鄙逗  
浦波尚險即陸路纔砥依稀見州郭倉皇問官邸土牆  
訝半頽草屋驚全圯所幸民俗淳稍使客情喜北來既  
旬月西去尚幾里嚴程謂已近危途方始此沮洳浩茫  
茫菅茅複靡靡幽燕去魂斷伊洛望心死日暮坐空牀

浩然念枌梓

詠懷

結廬在西市藝藿仍種葵謂將究安宅何意逢亂離三  
年去復還隣室無一遺所見但空巷垣牆亦盡頽久之  
得荒徑披拂認門基我屋雖僅存藿悴葵亦衰本自住  
山澤此悔將何追

又

庭前兩奇樹常有好看色年年遇雪霜誰謂寒可易大

道久已喪末路多涼德狐裘取適體誰念窮途客古有  
延陵子使還過徐國徐君骨云朽信義逾感激解劍掛  
高樹至寶非所惜此士難再逢四顧吾安適

和沈休文雙溪八詠

被褐守山東山東古於越州城冒陁峴嵐氣屢興沒剖  
竹曰有行思君不能發指途期闌暑下車已涼月汲黯  
薄淮陽子牟戀魏闕豈伊念川途固亦悲朝列日月倘  
垂照猶堪慰寂蔑

寄宋潛溪

孤鴻失儔侶連翩洲渚湄自知羽翮短不與同奮飛寄  
聲奮飛者當慎子所之煙波渺無從雲路迥難依雲路  
多鷹隼煙波有虞機

又

昔與君別日妾蠶初弄絲何意時運傾寒衣今已治衣  
成向誰寄冬雪旦夕飛雪飛猶自可時去端足悲韶顏  
忌凋落華志驚變衰安得君子心不隨年歲移

還舊居

自我遠行游故廬今始歸如何廿載間舊事都已非  
曳杖過比隣相呼尋故知不見垂白翁但見初長兒  
我園既稍葺我田亦就治種秫釀美酒拾薪煮豆糜  
一笑集親朋相從說睽離以之感疇昔俛仰多所悲  
人生一世中所憂渴與饑力耕給其用此外更何思  
便當息吾駕皓首以為期

田居

我生非匏瓜於世可無食躬耕實所慕戮力歸稼穡當  
春土脉動農事滿阡陌晨興負耒去日入弗遑息我苗  
今已長我耕有餘隙斗酒勞近隣隻鷄餉過客人生但  
如是亦足慰平昔此意誰復知千載惟沮溺

答李寧之

涸鱗思赴海倦翮念歸山如何遠遊客歲久不知還世  
途方擾擾豺虎尚為患久嫌軍務勞翻羨為客閒夜雨  
滴愁夢晨風颯頽年丈夫雖耿介亦或多苦顏而我承



結隣獨喜相追攀未堅金石交已枉瑤華篇時時感嘉  
貺相視兩悽酸豈不欲為答情深諒難宣

節婦操為賈妻作

父母嫁妾時遺妾雙鴛綺雙鴛既同生亦復與同死當  
知妾有夫結言亦如此妾夫今在遠妾身今獨止恐為  
行露侵莫與雙鴛齒飲恨赴長川竭恨乃已

立秋日言懷

六龍不可頓四序忽復移氣變感人心愴然已秋時池

荷挺素質園葵暎芳蕤豈無一日好不久還當衰覽物  
惜年邁撫景傷志違日暮坐空堂此懷當告誰

中秋無酒

彼節忽已易吾年信難留含情及玄夜逝將秉燭遊皎  
皎明月光照我城南樓常時猶足賞矧乃當素秋東隣  
有美酒飲之祛百憂客來無由得虛使時運流未知明  
年月還如此夜不既虛行樂志空歎將誰尤

遊赤松山分韻得弟字

旦發東郭門晚憩北山址乍離城市喧並羨丘壑美舍  
車陟嶇嶇停策玩清汎遊目蒼崖顛放情白雲裏攀林  
感落英涉澗悲逝水冀憑棲遁蹤往遇冥寂士忽見山  
阿人彷彿君平起何當乘素煙相與嚼丹蔬牧羊事已  
乖鍊石情徒止長揖謝荒祠永愧爾兄弟

別宋潛溪

昨宵郡齋宿今旦赴行舟官程不敢違可使須臾留掩  
泣別故交強顏逐前儔未嘗去鄉邑詎能千里遊金陵

古帝鄉雄跨東南州至今列甲第熒熒居公侯冠蓋若  
雲擁車馬如川流厚祿不虛授高才將見收如何獨多  
念去去懷百憂

寄王子克

燕燕何從來其羽已差池飛入華堂內意在巢君惟君  
惟豈不好傷哉非故知引去方未能欲畱復迴疑噉噉  
追晨風翩翩空暮閣

送人赴廣信軍幕

慙慙促夜絃翩翩戒晨軸臨分將列觴指景念出宿羈  
思無定端官程有成速含思登迴陌抱疾度遙陸前峰  
日銜岫後蹊風出谷將投近村去惟見遠煙綠冰溪渺  
森沈玉山鬱駢矗方遠悲路長逾前嘆期促保障固優  
暇邊情易翻覆贊政諒匪難布德在所勗古來固疆圉  
豈皆藉頗牧

送人從戎

世事諒難必伊人去從戎平生二三策乃用軍帳中東

卷二 百六十九  
郊已春陽北陌尚寒風千里違鄴城幾日到邊封漢幟  
正星羅淮騎亦雲從已入青油幕猶帶駢角弓願言帷  
幄士勉贊戎馬功但期膺厚賞不忌捐薄躬庶幾邊上  
人咸識爾為雄

贈賈思誠

短願本有涯長憂自無端道心日迥絕衰病坐連綿瑤  
琴廢不理金鏡掩莫看誰能蠲茲疾併用駐吾顏澡真  
藉靈草測化奇神丹神丹法已閤靈草名尚傳或求向

蓬島或採自鐘山何彼巫咸輩竟墮伎術間楚辭稱九  
折周禮稽十全問名未為悅染味方自嘆賈生妙斯理  
輒使旌其賢莫言相遇易知音古猶難

寄友分韻得枝字

彼山猶有崖此木猶有枝而我懷所思憂來獨無時我  
有澤上蘭春至尚猗猗折柔欲有贈延意及秋期秋期  
日已逝蘭葉日已衰人生非草木勿為寒暑移

城東會飲送王天錫

陰崖斂暝霏霜陸耀晴  
曉蕭蕭落木多縣縣衰  
草遍開冬感徂物列飲  
會羣彥美醕溢流霞妍  
談粲餘綯時髦非我匹  
清樽豈余戀行矣送將  
歸悵然罷歡宴引領阻  
雲從搔首歎蓬轉

送劉彥英東還

轉蓬無定在飄飄將何之  
未遽離本根賴有回飈吹  
在昔從一官整駕來南陲  
何意十載畱竟負三年期  
上有垂白親下有初長兒  
平生已艱瘁况復當亂離  
及茲神



武師拓地如拾遺遂令客行士秋晏薄言歸慈母既生  
還弱子亦抱持歌舞入故都志願幸無違鴻鵠遊四海  
鷦鷯守一枝寧守卑棲分不隨鴻鵠飛

舟發嚴陵承以愚天錫諸公追餞

祇役旋故都艤舟析親知臨岐辱飲餞舉觴念睽離躑  
躑東城闌徘徊江水湄頽陽無停照別晷有成期屏跡  
堪養疴樂道可忘飢持此特久息豈伊聊暫違願君崇  
令德蜚聲慰暮遲

舟次蘭陰憶寄君善敬德濬仲諸友

曉帆發巖瀨  
暝棹次蘭陰  
悲歌泛洄渚  
引領睇長林  
眷言遵舊蹊  
欲往訪所欽  
水行厭棲薄  
室邇阻窺臨  
川靜集潛虬  
林茂萃鳴禽  
獨無羣居志  
感嘆難為心

苦齋

薄遊倦簪履  
斂性偃林阿  
羣峰既旁繞  
衆卉亦前羅  
暄風改故栢  
微陽變陳蘿  
茶生綠堦上  
櫟長陰軒多  
察性寡柔葉  
辨味掇芳柯  
苦節既可貞  
佳名矢弗訛  
享歆寵

王使集蓼莫皇家尊盛猶若茲疵賤將奈何願賜卜身  
訣庶免後賢嗟

看松菴

結構在中林林木何離離  
簷隅聳喬幹庭際俯樛枝  
蜿蜒蛇鹿尾揚矯矯龍形  
垂稠陰暗軒戶積髓滑堦  
基美人遊未還素心適在  
茲豈不念封植無由敦佳  
期岱畎稱  
夏書徂徠詠周詩屈身古  
則然違志今豈非急雪交  
橫  
至嚴飈左右吹所貴貞白  
質不為寒歲欺

同子克濬仲遊北山夜宿覺慈院

窮年厭喧囂  
今晨愜遊衍  
豈伊清曠懷  
直為朋知展  
指途陽已昇  
入谷光未顯  
涉流既百折  
尋山亦千轉  
停策樹頻倚  
攀林芳屢蹇  
路夷始出幽  
山暝復凌緬  
佛廬既栖薄  
僧榻聊息偃  
地僻心自怡  
俗遠慮乃遣  
明發有佳趣  
勝處將歷踐

往山洞

既停九龍策  
歷醕禮前賢  
復尋三洞蹊  
東玉朝羣仙  
羣

仙去綿邈遺跡費采甄標峰絢霞外裂竇綵雲間旁聽  
流活活俯瞰深淵淵脊曲駭初入膝阻艱屢遷躡迥方  
蟻伸緣隅乃猴牽冥行路易失前導火頻然傾壁見斜  
倚危室覩孤圓穴杳石如透潭空海疑連涉深怯龍躍  
出險怵途慳紆徐度虛隙恍惚脫重泉僕御矜乍徃朋  
徒慶生還夙志愛游役芳時屢徂讐流光忽我邁踐勝  
及茲年栖息固有期遲暮復何言二皇倘可值顏齡庶  
能延

登鹿田

山北倦游覽山南縱攀援苔滑豈可步蘿弱猶足捫力  
竭轉脩蹊險盡得平原排峰作郭郭列岫代墉垣披拂  
趨蘭社靡迤入松門奇石既羅逕初篁亦當軒鹿耕事  
固遠仙化跡還存野田遺舊場孤塚秘精魂感徃情已  
劇懷來念彌敦學道值時阻攝生逢景奔何能棄緣業  
即此窮朝昏

贈別祝彥明

悵望臨荒蹊驅馳騁遐步江紆練月初山標綵霞暮天  
長路易迷水深舟難度征人去不息僕夫倦相顧此時  
悲送君安能髮不素

白紵歌

闔廬宮中夜撾鼓宮樹烏啼月未午玉缸提來酒如乳  
白紵衣成向君舞美人醉起行步難腰間珂珮聲珊珊  
肯緣嬌愛減君歡寶釵墮地不敢言宮中門戶多無數  
君恩反覆日幾度明朝重著舞時衣心中已道不相宜

當窓織

當窓織貧家女兒堪嘆息  
隔牆惟聽伊軋聲墮珥欲收  
應不得兩日織成花錦段  
盡輸上官猶識緩夫婿復來  
催上機豈念身穿藍纓衣  
君不見富家娘不識蠶桑著  
綉裳

涼州行

涼州城頭聞打鼓涼州城北角  
聲苦羽書昨夜到西京  
敵兵已犯涼州城涼州兵氣若雲黑  
百萬人家皆已沒



漢軍西出笛聲哀敵騎聞之去復來年年此地成邊土  
竟與敵人相間處敵人有婦能漢音漢女亦解調敵琴  
調敵琴按敵譜夫婿從軍半生死美人踏筵尚歌舞君  
不見古來邊頭多戰場生男豈如生女強

題平章公所藏天馬圖

君不見余吾水中天馬出赤鬣縞身朱兩翼割玉為鞍  
韉不得錦衣使者捷若飛紫韁金勒看君騎却憶拂林  
初獻時鳳城五門平旦啓馳道行驕轡耳耳路旁見者

誰不喜衆中牽出朝未央揮霧流沫滿道香毛帶恩波  
眩日光龍眠老子識馬意行過天關重回視白筆描成  
落人世我公購之灤水濱百金市畫冀得眞奔霄追電  
何足云從今吹笛大軍起料知一日行千里塞上擒王  
獻天子

湖州行送人作郡

湖州歲歲修城堡敵騎時燒城外草城外居民如野鹿  
目睽睽兮尾促促去輸官稅輸不足半在軍中半在獄

獨畱新婦餉姑前也執吳綃供稅錢吳綃已盡歸未得  
復到官家候消息我相聞之憂爾湖命運賢侯此剖符  
賢侯若為湖作主便須罷却徵求苦畱得湖民障茲土

題顧氏長江圖

天下幾人畫山水虎頭子孫世莫比何年寫此長江圖  
多少江山歸筆底巴陵三峽天所開遠勢似向岷峨來  
洞庭瀟湘僅毫末楚客湘君安在哉江上一朝風雨急  
老我曾來踏舟立鼓枻既聞潭畔吟抱琴復聽竹間泣

別來幾日世已非忽此披圖憶曩時早知避地多處所  
肯逐紅塵千里歸林下一夫巾屨似亦有丹人與漁子  
能添野老煙波裏便與同生復同死

題出射圖

玉門關南百草腓玉門關北關兵稀邊頭無事秋馬肥  
將軍出射沙塵滿一人據鞍執大旗翩然前導疾若飛  
一人引弮如附枝一人放箭箭不知後有兩人蹙騎追  
側身拔鏃恐鏃遺玉門關城迥且巍一時士馬何神奇

我來塞外撫邊陲曾揮此馬看君騎為君取酒盡千卮  
醉裏爭誇戰勝歸到今已是十年期畫家所寫是耶非  
却憶當初親見時

題打毬圖

健兒擊毬世未見人馬盤盤若風旋場中一點走如飛  
三人躍馬爭先馳兩人翻身驚且嘆前視後視迴迴轉  
平沙蹙踏黃入天肯使蒼鷹飛向前身忘激射但狂走  
未知毬落誰人手君不見秦失其鹿人共逐劉項雌雄

幾翻覆

經金繩廢寺

寂寞唐朝寺  
頻年客到稀  
空山孤殿在  
荒徑一僧歸  
苔色驕秋雨  
松聲振夕暉  
驚鳥初有託  
近亦出林飛

歲暮感懷

移家東海上  
汨沒度危時  
草市腥江鮑  
民居雜島夷  
衣冠隨俗變  
姓字畏人知  
保已無深計  
翻言命可疑

客居

漂流何所往寂寞住湖陰  
道路無知己飢寒亂此心  
草枯春牧遠浪濶夜漁深  
豈憚艱虞事衰年自不禁

辛亥除夕

湖海風雲暗道途霜雪清  
如何一年盡翻使百愁生  
俗薄乖歸計時危緩去程  
家人團坐夜應悉旅中情

訪止公於文溪

杖錫遊茲地過從動隔年  
已無離別想那有去來緣  
心  
事青山外禪機白石前  
偶來非道意敢借慧燈燃

除夜客中

歲月遽如許蹉跎老却人一年惟此夜明日又逢春湖海未歸客風塵多病身感時渾不寐燈火獨相親

郡齋度歲

失脚雙溪路今經兩度春不堪飛雪夜還作望鄉人世事方如夢生涯笑此身惟應兩蓬鬢不負歲華新

寄寧之鵬南兄弟

攜家非得計世亂麤求安有季俱行役誰人救急難月



從愁裏沒雪向望中寒昨夜鄉書到知君不忍看

又

一自干戈後先廬幾處存遽成豺虎峽愁殺鵲鴒原歲  
酒空茲夕春風非故園憂來無避處只是倚衡門

投同僉公

授鉞幾專征分藩復此行身為漢飛將家若魯諸生秘  
畧三邊靖妖氛一劍橫已多門下客持筆待成名

郡齋守歲

守歲寒齋裏開盤試莫辛  
杯行猶是臘酒醒即逢春  
天地長為客風塵嘆此身  
歲時追往事獨有老隨人

送歸安丞

之子官何處湖流一舸通  
汀洲蘋影外城郭水光中  
夜泛苕溪月春吟箬下風  
若逢陳太守為報已衰翁

送趙司令

自入驃姚幙從軍凡幾年  
却緣鹽筴利去讀海王篇  
蜃氣侵官舍鮫人迎渡船  
看君年未艾暫出莫悽然

除夜客中

已就長途往堪憐暮景斜一年惟此夜千里更誰家  
戀困心空亦憂時髮已華此身如可乞只合老煙霞

歲暮留別

從宦不得意歲闌聊復歸親朋隨地有情誼似君稀  
舟小容分榻裘單許借衣平生歲寒意臨別重依依

自定川入海

乍離東海郡又上北溟船紅見波中日青窺水際天鄉

關十里隔身世一帆懸鄉信何從達歸鴻落照前

至膠州

自入東膠路鄉邦此地賒人悲西候日帆際北溟霞民  
俗農為業州城土作家驛樓何處是庭樹暮樓鴉

宿高密

客路信悠悠荒城許暫投黃塵齊地晚紅葉海邦秋燈  
影明官驛鐘聲度縣樓去家今幾許猶自夢東州

寓昌樂

淮海來時路東西幾日程一年行萬里數口託孤城邯  
水方馳箭峭函未罷兵餘年已無幾坐此欲何成

次益都

使傳來遙甸征車馳近垆茅廬城外市楊樹驛邊亭溜  
水穿原綠牛山入郡青西遊應未遂又復渡滄溟

次韻寄陳大參

仙風久仰羽人丘功業今歸戶牖侯萬事糾紛難辟穀  
一秋衰謝獨登樓思閒已蠟遊山屐願治方資濟海舟

聞說中營頻倚注文園肺病幾時瘳

次韻游上方

故人邀我破愁顏風磴雲巖尚可攀  
五色蓬萊常近郭一湖波浪欲浮山  
江皋極目雙楓赭澗道傷心細菊斑  
作客異鄉俱老大乘時吟賞不知還

登大牢山

海上名山誰作隣數峰高起自為羣  
林明夜見水底日浪動朝疑巖下雲  
渺渺乾坤何處辨迢迢齊楚此中分

那看回首東南地烽火連年警報聞

宿高密

杳杳山城倚暮天依依墟里見寒煙海邦出息空今日  
齊地徵求異昔年俗鄙誰歌招隱曲道窮虛誦卜居篇  
故鄉回望在天末一片歸心對月懸

營丘

空壕廢堞繞營丘一望淒然使我愁賜履封侯千古在  
尋盟霸業此時休鴉啼古木西膠暮鴈落平蕪北海秋

回首江南萬餘里異鄉如此若為留

北海郡

齊國西行幾日程平原望望怯初行雨  
途車過泥藏轍晴巷馬來塵滿城  
野色北連三晉遠河流東注兩淮清  
中原土俗古云樂老我今多萬里情

偶書

自從北渡浣紗溪十載家山入望低  
失學已憐元亮子長齋應愧太常妻  
百年世事醞鷄變一夜鄉心謝豹啼



却向歸途望遼鶴白頭和淚寫淒迷

寄沈隱君

故人家住白雲隈占此崖盤與澗迴風挾水聲歸逕竹  
日將山影上階苔律書在篋身同棄瑞檢堆床手自開  
聞說蓬瀛從此達須騎白鹿訪君來

晚至永樂

江干細路走羊腸遠逐鐘聲到上方水荇暝時雲淡淡  
逕松深處月蒼蒼佛廬夜續傳燈火僧榻寒薰小篆香

何用別尋天竺去人言此地即慈航

寄丁鶴年

衡門之下可棲遲且抱遺經住海涯東漢已編高士傳  
西方仍誦美人詩衰年避地方蓬轉故國傷心忽忝離  
天末秋風正瀟瑟斷鴻聲徹暮雲悲

梅簷為天叙師賦

上人曾住大梅山坐看簷梅眼欲穿白足亂迷行道日  
寶花輕墮講經天肯將素服欺塵夢只許清香入梵筵

看到常師成熟後方知此道有眞傳

寄俞伯熊兼柬李仲彬

東郭先生最老成天才久已負時名  
能詩不減唐工部解飲渾如晉步兵  
塞上征鴻高避弋海東歸鶴暗聞聲  
比隣喜有知心客一夜彈碁直到明

懷宋庸菴

麥秀歌殘已白頭逢人猶自說東周  
風塵瀕洞遺黎老草木凋傷故國秋  
祖逖念時空擊楫仲宣多難獨登樓

何當去逐騎麟客被髮同為汗漫遊

懷滑攫寧

海日蒼涼兩鬢絲異鄉飄泊已多時欲為散木居官道  
故托長桑說上池蜀客著書人豈識韓公賣藥世偏知  
道途同是傷心者只合相從賦黍離

宗道師曾許尋鄭元東春草圖見寄詩以促之  
平生不識鄭山輝寫草成圖偶見之恍惚驚羣翻水日  
依稀鴻爪印沙時康成已矣空書帶靈運悽其但夢池

寸楮尺縑能寄否敢憑歸鴈致深期

哭趙太初

蒲團兀坐幾經春獨把南華味道真已薄丹砂勾漏令  
空憐白髮杜陵人山中舊別期猶在世上遊名跡易陳  
楚些吟成無處寄暮雲回首泣沾巾

訪楊季常於陳山回途有述

為憶幽人八十餘片帆來訪水南居已知揚子門多酒  
誰信馮驩食有魚一代定歸名士傳百篇真授伏生書

前朝人物今無幾獵罷猶堪載後車

詠懷古迹

客來偏自說姑蘇吊古今人百感俱祇訝當年嘗越膽  
那堪此日聽吳趨荒臺鹿下江聲咽古木烏啼月影孤  
欲問闔閭埋葬地五湖東畔已荒蕪

秦湖漁隱為袁桂芳賦

履運應成昔名湖尚說秦避時端有意把釣可無人若  
士居姚水遺風似舜民地雖占越土境實異河濱已忝

歸漁業何言託隱淪月浮孤艇夜雨著短蓑春泊渚多  
依藻窺汀或傍筠羽沈疑中餌絲動訝拖鱗竭澤知難  
脫殃池數乍屯競多聲失厲得雋語忘嗔懶怨誅求盡  
龍嫌蕩漾頻腥風連巷陌穢浪接沙塵水際呼兒急牆  
頭換酒新謳歌便野習嗜好任天真行媿清狂客名傳  
放逐臣家臨煙浦近門對雪溫馴釣渭心徒苦興周跡  
已陳子陵辭漢日賀老別唐辰事業今如是棲遲固足  
珍青雲人既遠白首我還親衰謝無知己飄零偶問津

但期連郡邑豈料結比隣

瀟湘夜雨

洒江思已悲入夜聲轉急還憶在荆南卧聽湘妃泣

賈鄭二君子見訪賦絕句

客路誰為骨肉親兩君邂逅結比隣相交自可到頭白  
世亂還家有幾人

又

欲具盤飧餉故知村荒市遠只隨宜家人不解艱虞事



猶想客來如舊時

又

白首相逢能幾迴  
羨君仍作等閒來  
明年此日知何處  
且向空庭嗅落梅

旅懷

春半家書預作期  
長兒十月送寒衣  
江空野曠無消息  
踏遍蒼苔人獨歸

又


數口迢迢寄海邊  
鄉心客計兩茫然  
老妻豈悉未歸意  
將謂飄蓬似往年

又

獨向荒村歌竹枝  
寒煙暮雨不勝悲  
平生一種淒涼態  
豈料偏歸老大時

憶汪遯齋

四明羈客近如何  
別去今纔一月過  
記得小齋多野思  
豆花陰裏唱離歌



石倉歷代詩選卷二百六十九